

月 780

895

部-12

武林藏書錄卷下

徐孝先先生

徐孝直字孝先仁和人明季諸生父灝崇禎甲戌進士知武陵縣早卒母陸育先生而實徐故仁和貴族甲第蟬聯家塘西之落瓜里有田有廬有圖書金石彝器遭亂散失忽自落瓜走河渚愛其清幽遂寄棲施相之廡河渚漁樵皆笑爲狂生先生曰我非狂乃狷者也易名介更自號曰狷庵與注杲陳際叔應嗣寅善晚識馮景爲忘年交嘗謂友注杲曰自際叔嗣

錢塘丁

車撰

行



寅歿後杭州十萬戶虛無人矣今有半個在馮山公也杲問故曰未知後半截何如耳積書千卷教授童子五六人各授小學盛暑必衣步趨翼如生平不妄交一人戊寅秋一夕中風卒於施相家年七十有三相字贊伯亦隱君子馮山公林鹿庵爲之作傳

皋園清校閣

餘杭有三嚴先生者長調御次武順次敕明嘉靖乙未進士太常大紀之子也最有名三嚴各有才子曰渡曰津曰沆亦曰三嚴而沆之名尤著沆字子餐號顯亭順治乙未進士由庶常拜諫官歷官戶部侍郎

幼以孝聞善射命中無虛發順治丁酉典試山東以聖裔向無舉額四氏子每難中雋疏請科舉二人遂著爲令太常始居杭州今呼爲嚴衙衙者舊第在焉其後侍郎又割泥橋前明金中丞學會別業之半爲皋園以誌皋魚之痛有梧月樓綠雪軒小太湖諸勝宋荔裳施愚山皆有題詠若清校閣則藏書萬卷處也著有奏疏十二卷北行日錄二卷皋園詩文集四卷後諸子分居省城康熙中同日被焚圖書遺集遂無子遺見碧溪詩話及杭郡詩輯顯亭之後人鷗盟燕家於會城之羊市街篤學勵行著述等身爲阮文

達編輯 皇清經解名益起其題呂東萊大事記有句云清校樓遺書散失不可復僅存目十二棧觸酸心腹可以知當日之所藏矣

吳託園先生

吳任臣字志伊一字爾器初字鴻征號託園仁和諸生康熙己未薦試博學鴻詞列二等授檢討好讀奇書家貧教授里中會兵亂江南大姓皆竄匿里中少年載其書入市以一錢易一帙託園罄修脯以爲市於是吳中書悉歸之併晝夜讀之久益淹貫應大科時馮相國延館之爲佳山堂六子之一六子者託園

與同郡吳農祥徐林鴻王嗣槐蕭山毛奇齡宜興陳維崧也旣入翰林十年不遷會詞臣奉

命校書多謬誤每奉詰責眾懼競以書致乞代校迫於情竭四十晝夜乃終卷而心疾作迨中允之

命下而託園已先一日死年六十二所著有周禮大義禮通山海經廣注字彙補春秋正朔攷辨又取唐季諸霸國事爲十國春秋一百十四卷尤稱詳核按十國春秋自訂凡例云五代迄今六七百年世代久遠正史故多遺失而歐史載十國事尤缺畧是編所采古今書籍無慮數百餘種若冊府元龜太平御覽

等書愚輒蒼萃成書都爲一部倘臆說杜撰率爾無徵實所未敢託園先生當兵燹之餘留心經籍生平著作等身觀其引徵之多卽可見其收藏之富矣

玉玲瓏閣

龔佳育字祖錫號介岑由經歷知安定縣入爲戶部主事歷兵部正郎遷山東按察司僉事分巡通永以政績聞特擢江南布政使內遷太常卿改光祿歷中外數十年以清介著生平無他好惟收藏圖史課子誦讀以毋墮家聲爲戒子翔麟字天石號蘅圃康熙辛酉順天副貢歷官御史立朝有直聲未幾罷歸居

橫河沈氏之庾園園以玉玲瓏得名宋花石綱物也築玉玲瓏閣以儲書更刻唐陸淳春秋集傳纂例春秋微旨春秋集傳辨疑元趙汭春秋左傳補註明朱睦㮮授經圖爲玉玲瓏閣叢書晚年移家張駝園自號田居有田居詩稿玉玲瓏閣詞錢塘志稱翔麟讀書萬卷可知育之家學洵不愧詩禮之傳也

日及園

錢塘朱慕樵先生觀樹堂集有日及園藏書散逸已盡乙巳曬書日檢校舊籍上架訖用懷麓堂韻示素岑鶴羣菑潭詩云眾山如排籤入夏青未了爽籟奏

疏林蠹簡恣幽討及茲曬腹辰俯拾焚餘稿束髮讀
父書徒影趁昏曉窮搜剔疑義判若河漢眇鑿破肺
腑愁時雨活枯槁維時困泥蟠屬望致身早吾生幾
寒暑白髮只催老雜說攤牀頭爬梳費指爪記予通
籍初太歲方在卯一行刀筆吏來日或苦少鳥停剝
啄聲門罕佳客到牆壁裏蛛絲鼠迹粉不埽十年人
不歸芸火失熏燎官貧無長物治生計草草黃嬾爲
睡媒方寸累憧擾聞諸先民言鬻書豈爲孝舉世賤
詩書憲貧而顏夭回顧兔園冊一一典細縹殖學如
登高層累上危嶠汝曹幸勉旃我室他人保庶幾幹

蠱初吉占無咎考救此空腹兒殊勝嚼珠寶又一半
句留記云樟匍匐下里家少一椽井曰之間總無長
物因而煢煢飄寄如流寓然也今卜宅一區黃泥潭
上與袁氏雪堂不數武甥素岑宅也稱有鄰矣樓勢
面湖諸山環之頗富流覽與鶴羣葭潭兒輩讀書遊
息之所顏曰一半句留取白香山未能拋得杭州去
一半句留是此湖詩句按杭郡詩輯先生諱樟字亦
純號鹿田又號慕樵晚號灌畦叟康熙己卯舉人由
四川江油令擢部郎出守澤州少從毛西河遊頗爲
所賞征車所至載書以行涉勝地弔遺迹務窮考索

而宣之於詩歸田後徜徉湖山之勝年八十卒府志
入名宦傳

廣仁義塾

仁和黃樹穀松石孝子也有負骸圖詩云負骸孤走
保陽城日日愁霖淚雨傾只有父魂兒命在夜來同
宿晝同行其先世官少參者人呼爲黃佛兒松石詩
云爲展松楸到梵村墓門華表百年存白頭山嫗遙
相指黃佛兒家七代孫嘗得子貢手植楷癭於孔林
其癭容升許宣之廣仁義學遂以題軒并名其集義
塾在武林門外東馬塍北少參貞父先生故第卽其

居開塾聚書其中供四方來學者閱誦每書全部板
心折縫處斜蓋廣仁義塾四大字爲記使人不能巧
偷豪奪書多精本亦藏書家之變體也

好古堂

舊鈔本好古堂書目四卷不注撰人名氏前有康熙
乙未夏杪錢唐姚之駟序稱予世父首源先生束髮
受書已能沈酣故籍乃一生坎壈兀兀窮年惟手一
編枯坐先世既有藏書乃復按之市肆布諸巾箱久
之而插架者與腹笥俱富矣暇時錄於簿籍小子寫
爲副墨云末附收藏宋元版書目凡數十種按府志

儒林傳姚際恆字立方號首源仁和諸生少折節讀書泛濫百氏既而盡棄詞章之學專事於經年五十日向平婚嫁畢而游五嶽予婚嫁畢而注九經遂屏絕人事閱十四年而書成名曰九經通論凡一百六十三卷又著庸言錄若干卷雜論經史理學諸子末附古今僞書考持論極精嚴又杭郡詩輯首源博究羣書撐腸萬卷毛西河嘗作何氏存心堂藏書序以示其兄大千大千曰何氏書有幾不過如姚立方腹笥已耳其爲一時推服如此是著書之富與藏書相埒魯思先生濡涵家學宜乎爲諸生時卽以所撰類

林新詠三十六卷進呈

乙覽爲杭士美談也

吳石倉先生

乾隆杭州府志吳允嘉字志上又字石倉錢塘人性孝友雅好吟詠爲文原本六經旁通史漢而章法頓挫刻意規撫蘇歐于經世之學尤所殫心生平愛藏書丹鉛點勘晨書暝寫凡山經地志墓碣家乘下逮百家小說叢殘之書蒐討不遺餘力晚年嗜好尤篤有四古堂文鈔石甌山房詩集石倉存稿石倉牋奏武林文獻志藏於其家又碧溪詩話石倉先生爲湖

墅者宿嗜學好古積數十年苦心歿後故書散落人
閒予在汪氏振綺堂見其手鈔書可數百冊楷法醇
古毫無俗態望而知爲有道之士其他散處於書賈
求售者更不知凡幾嘗輯武林耆舊集自漢迄明其
稿在吳甌亭處予借錄一過編定爲二十卷又嘗手
輯錢塘縣志補皆魏志所未備者黃小松述其臨歿
時口占一絕示兒輩云幾卷殘書幾畝田祖宗相守
已多年後人窮死休相棄免教而翁恨九泉誦之黯
然予每與何春濬陳二西談其餘韻訪其後人均不
甚深知後客任城訪知令嗣文思孫漢隄同客山左

皆業儒文思曾中副車掌教某書院按樊榭山房集
哭吳丈志上詩斜廊暴畫處尙想立蒼苔自注吳丈
書齋有暴畫廊志上先生世居北郭之梳觴橋予得
其耆舊集稿本爲羅鏡泉舊藏惜殘缺未全擬重加
補輯而刊行之

小山堂

趙谷林昱意林信居平安坊家有小山堂藏書甲一
郡乾隆丙辰同舉鴻博谷林子一清字誠夫學尤駭
貫著酈氏水經註牋釋爲

四庫所著錄當

四庫開館時趙氏書已雲散微書

諭旨中尙及之全謝山太史有小山堂藏書記曰近日浙中聚書之富必以仁和趙徵君谷林爲最予嘗稱之以爲尊先人希弁當宋之季接踵昭德流風其未替耶而吳君繡谷以爲希弁遠矣谷林太孺人朱氏山陰襄敏尙書之女孫而祁氏甥也當其爲女子時嘗追隨中表姑湘君輩讀曠園書旣歸於趙時時舉梅里書籤之盛以勸諸子故谷林兄弟藏書確有淵源而世莫知也予乃笑曰然則宅相之澤亦可歷數世耶何惑乎儒林之邈其譜系耶繡谷曰然嗚呼

曠園之書其精華歸於南雷其奇零歸於石門南雷一火一水其存者歸於鶴浦鄭氏而石門則摧毀殆盡矣予過梅里未嘗不歎風流之歇絕也谷林以三十年之力爬梳書庫突起而與齊不可謂之非健者已谷林之聚書其鑒別旣精而有弟辰垣好事一如其兄有子誠夫好事甚於其父每聞一異書輒神飛色動不致之不止其所蓄連茵接屋凡書賈自茗上至聞小山堂來取書相戒無得留書過夕恐如齊文襄之祖斑也每有所得則致之太孺人更番迭進以爲嬉笑嗚呼白華之養充以書帶之腴是天倫之樂

所稀也予之初入京師也家藏宋槧四明開慶寶慶
二志蓋世閒所絕無而爲人所竊歸於有力者之手
杭君堇浦爲告谷林亟以兼金四十錠贖歸仍鈔副
墨以貽予及予歸谷林但取所得地志示予其自明
成化以前者已及千種而予家宋槧哀然首列予不
禁爲之憮然谷林以予之登是堂也屢堂中之書大
半皆予所及見也請爲之記乃爲之題於堂之北墉
云又曠亭記谷林太君朱氏山陰襄毅公女孫祁氏
之所自出祁公子東遷夫人取朱氏女孫育之以遺
日卽谷林太君也方谷林尊公東白翁就婚山陰其

成禮卽在祁氏東書堂中是時淡生堂中之牙籤尙
未散東白翁心思得之太君泣然流涕曰亦何忍爲
此言乎東白翁默而止蹉跎四十餘年谷林渡江訪
外家則更無長物祇曠亭二大字尙存董文敏公之
書也乃奉以歸谷林藏書中亦多淡生舊本欲於池
北竹林中構數椽卽以曠亭名之以志渭陽之思以
爲太君當新豐之門戶又小山堂祁氏遺書記二林
兄弟聚書得之江南儲藏家者多矣獨於祁氏諸本
則別貯而弄之惓惓母氏先河之愛一往情深珍若
拱璧何其厚也碧溪詩話谷林先生同時吳尺鳧亦

好藏書每得一異書彼此鈔存互爲校勘數過識其
卷首小山書畫印牙章精篆神采可愛先生卒後悉
載歸廣陵馬氏汪比部魚亭與先生爲僚壻盡借其
善本錄副以藏予館比部家十數年見先生校書跋
語知先生點勘之精

汪韓門先生

汪韓門編修師韓字抒懷又號上湖雍正癸丑成進
士旣入翰林掌院學士奏直起居注張尙書照又疏
薦校勘經史督學楚南以事左遷傅相國恆復薦入
上書房又落職主蓮花池講席甚久桐城方制府

惟甸

陞見時

上猶稱其學問有感恩述事詩云白頭榮遇過升仙
之句掌蓮花書院嘗請方制府撥銀委買書籍約四
百函經史大書咸備錄書目四冊分存備考其自著
書凡觀象居易傳賤詩四家故訓春秋三傳注解補
正孝經約義語孟疏注辨異文選理學權輿孫文志
疑平于南雅清暉小志韓門綴學詩學纂聞坦橋脞
說談書錄皆自爲序其上湖文編中敬行軒記云先
君爲諸生時卜居炭橋嗣成進士縮符皖桐屋質他

氏忽忽十數年始還故居稍稍易朽治漏補缺扶危
屋仍舊觀而余髮皤然白矣堂以延客軒以攤書適
舍弟自浮山歸相與啟塵篋檢故籍則其爲鼠嚙梅
黧者十之三四而況於媼戚之零落時事之變更耶
於是懸籤插架暇輒雜誦於軒中而并題曰敬行軒
按韓門之父名振甲字昆鯨爲然明先生之元孫康
熙庚子舉人與弟德容及援甲南北同登賢書德容
雍正甲辰第三人及第援甲山西絳縣知縣其詩書
之澤有自來也

道古堂

杭世駿字大宗號堇浦仁和人雍正甲辰進士由浙
江總督程元章薦舉鴻博授編修著有續禮記集說
金史補史漢北齊書疏證續方言詞科掌錄榕城詩
話道古堂詩文集王瞿道古堂集序堇浦於學無所
不貫所藏書擁榻積几不下十萬卷堇浦枕籍其中
目睇手纂幾忘晷夕閒過友人館舍得異文祕冊卽
端坐默識其要申按先生以言事罷歸自號秦亭山
老民與里中耆老及方外之侶結南屏詩社所居在
大方伯里藏書之富甲於武林先生補史亭記云杭
子疏證北齊書旣畢越明年乃補金史先人庇屋積

有餘材營度後圃規爲小亭窗楹疏達高明有融乃
徙先世所遺羣籍凡有關涉中州文獻者悉置其處
廣榻長几手自讐溫閒有開明輒下籤記先生以補
金朝一史所聚羣籍已盈几堆榻則其他書之富可
知況兩浙經籍曾經編纂成志爲卷五爲目五十有
九爲書一萬五千有奇先生自序洋洋千餘言夫豈
以百宋千元自矜儲藏之富者所可比擬哉

隱拙齋

鶴徵後錄沈廷芳字晚叔一字菽林號椒園浙江仁
和人由兵部侍郎楊汝穀薦舉除庶吉士官至河南

按察使著有隱拙齋集案杭大宗有隱拙齋箴沈果
堂有隱拙齋記果堂又有沈公墓表云仁和沈公以
乾隆十六年十一月壬申葬其縣皋亭山公子廷芳
請表其墓公諱元滄字麟洲以副貢生進經籍

聖祖仁皇帝命入武英殿書局康熙六十年授文昌
縣又全祖望送沈菽林之蔚州引康熙中葉鹽官查
氏之詩鼓動一時菽林尊公文昌君爲聲山簷事愛
壻詹事下世查田諸老相繼歸里而風波驟起門戶
蕩析文昌亦橫遭吏議菽林崎嶇患難藏書星散楹
書偶錄黃先生大全文集五十卷後有跋云黃山谷

集南宋刊本吾家世藏宋本僅留此種是可寶也子孫其善守之乾隆壬戌除夕隱拙翁廷芳志各册有查昇之印仁和沈廷芳字晚叔一字菜園古桂下史古杭忠清里沈氏隱拙齋藏書印購此書甚不易遺子孫弗輕棄等印先生爲聲山宮詹外孫是書乃查氏所藏而後歸沈者世無二本洵至寶矣

小眠齋讀書日札

日札凡四卷古今書五百餘種每一書敘其撰人姓名并序跋略著書之大義閒參己論槐塘街人汪沆所述也沆字西顥號槐塘錢塘諸生乾隆丙辰舉博

學鴻詞額溢報罷少與王曾祥杭世駿符之恆張燴稱松里五子大學士史貽直欲薦舉經學以母老辭務爲有用之學自農田水利邊防軍政古今沿革方俗利病靡不條貫屢爲大府招致遇事直言咸感其誠分修浙江通志及西湖志所著盤西紀游集沾上題襟集津門雜事詩青囊解惑槐塘文稿俱已行世論語集注剩義湛華軒雜錄全閩探風錄蒙古氏族略汪氏文獻錄新安紀程識小錄泉亭瑣事說瘧及小眠齋讀書日札雖未梓行猶有流傳者

耳食錄

舊鈔本耳食錄八卷不著撰人名氏前有乾隆乙酉
早春濰山識云邊笥枵然鄴架又復羞澀偶有見聞
輒識其名目從夙好也嗟乎老饕垂涎八珍人以口
陳我以耳食快意云爾果腹乎哉每卷題南墅草堂
隨筆初疑爲吳澹川文溥及觀目中吳慶百徵君全
集條下云居武林西城余里中文章鉅公也其非澹
川可知追維再四當爲莫氏仇一鷗贈莫柳亭棧云
每逢君姪濰山話羨殺先生耐得貧鐵冶梅花郭婆
井百年供養老詩人蓋所居在鐵冶嶺正杭之西城
其爲莫濰山所著無疑濰山名濰錢塘諸生精算學

其藏書處曰翠雲書鳴所列各書雖無甚祕籍然亦
楚楚可觀

振綺堂

錢塘議敘大理寺丞汪汝璫字坤伯憲之長子也

高宗詔求四庫遺書汝璫恭呈家藏善本六百餘種
賜題曲洧舊聞書苑菁華兩種并

賞初印佩文韻府汝璫並獻父憲所撰易說存悔二
卷說文繫傳考異四卷附錄一卷苔譜六卷蒙著錄
及附存焉憲字千陂號魚亭乾隆乙丑進士官刑部
陝西司員外郎所居名館驛後性耽蓄書有求售者

不惜豐價以購築振綺堂儲藏點黠丹黃終日不倦
仲子璐字仲連號春園乾隆丙午舉人有松聲池館
詩存嘗擇所藏祕籍錄爲題識四卷璐子誠字孔皆
號十村乾隆甲寅舉人官刑部江西司主事篤志縹
緇無他嗜好以先世未著書日盡發所藏編分四部
詳考撰人姓名並注明得自何本閱歲而成凡書三
千三百餘部計六萬五千卷有奇雖在病中猶手自
繕錄子遠孫字久也號小米嘉慶丙子舉人內閣候
補中書著有詩考補遺國語考異漢書地理志校勘
記又以杭郡志乘存者惟潛說友臨安志爲最古仿

宋重雕有功文獻汪氏代衍甲科門承通德牙籤縑
軸歷百數十年而始散於庚辛之劫至今一鱗片甲
猶有存者積厚流光書其一端云

繡谷瓶花齋

吳焯字尺鳧號繡谷錢塘人喜聚書凡宋雕元槧與
舊家善本若飢渴之於飲食求必獲而後已故瓶花
齋藏書之名稱於天下所輯繡谷薰習錄八卷則記
所藏祕冊也家九曲巷園有古藤一本花時柔條下
垂如瓔珞構亭曰繡谷命酒觴客賦詩爲樂著藥園
詩稿陸渚鴻飛集南宋雜事詩玲瓏簾詞長子城字

敦復號甌亭監生承其先業儲藏所未備者按求校勘數十年丹黃不去手城弟玉墀字蘭陵號小谷乾隆庚寅順天舉人由太平教諭歷官貴陽府長寨同知有味乳亭集乾隆間

詔徵遺書時城已歸道山玉墀恭進經部陸氏易解等九十餘種史部四明它山水利便覽等二十餘種子部東宮備覽等三十餘種集部李遐叔文集風雅逸篇石洞遺芳三種蒙

御題說文篆韻譜呂祖謙歷代制度詳說二種并賜佩文韻府

天祿琳琅前編宋元明外僅金刻一種後編始有遼刻龍龕手鑑有繡谷亭續藏書吳城敦復諸印彭元瑞識云於是宋遼金元明五朝俱全足以見繡谷所收之富其舊藏宋刻許渾丁卯集失去廿餘年甌亭忽於京師重得之賦詩紀事屬同人和之趙昱詩云故人繡谷翁素業今有後插架饒萬卷郎君能密受昨歲賦北征目擊心慘愀一編手澤新故物爲吾取歸來屬流詠父客若某某遺書重丁卯感逝在癸丑雲煙洵過眼聚散無乃偶身沈名自飛家禪學業久太息予索居賤老印樊守五載京國游躋蹬風塵走

還將舊雨尋室是人琴否瓶花坐空齋老藤延几牖
憶翁耽典籍愛護等瓊玖往往許假鈔校十得其九
叢書精審過運管勘不苟嗟哉衣食謀勿爲飢寒詬
吾亦示兒曹制矩緬良友誠以蒲公言三復眞不朽
自注繡谷藏書頗矜惜不輕借人獨許予鈔予所藏
多繡谷亭本予偶得善冊先生見之亦必取以勘定
又金志章詩樓居插架逾萬籤五車四庫皆能兼丹
黃一一手勘定部分鱗次何精嚴就中名集數丁卯
槧本最古心所欣何年一鴟竟羽化巧偷豪奪生憎
嫌六丁冥搜苦無計廿載抱憾歸幽潛讀書繼緒有

令子手澤每念襟常霑驅車偶然適燕市輒紅撲面
塵纖纖朝聞邸舍打門急有客持售初開函衛公故
物忽驚覩悲喜交集敬拜瞻卷端題識認遺墨左方
印記留朱鈴呵護定蒙鬼神力點沈未受魚蟲穢探
囊購贖敢辭罄百鍛索價貪寧嫌楚弓楚得足深慰
摩挲繙玩忘飢饑羽陵蝨簡共什襲宛委祕冊同包
緘攜歸陳書告先子水沈細炷方銅匱孝思靈爽其
感召丁部重入如新添熊熊日上吐光氣南極果應
去聲星文占抽思騁祕發高詠妙處神味超酸醎同時
題贈悉巨手雕章麗句盈緇縑唯余經年負夙諾苦

吟屢斷霜髭拈郢州有知應大笑笑我細響徒詰詰
不如韜筆且藏拙靜看花影搖風簾

孫氏壽松堂

孫宗濂字栗忱號隱谷仁和人乾隆甲子舉於鄉一
試春官卽息轍鄉里構堂曰壽松藏書數萬卷以枕
藉爲榮子仰曾字虛白號景高歲貢生候選鹽運司
運同胚胎家學賡續緒餘未槩元雖充劔几架鼎彝
碑版羅列文廚梁山舟學士王夢樓太守相與題評
考跋乾隆癸巳應

詔進書數百種內乾道臨安志三卷仰邀

御題並

賜佩文韻府全部士林榮之書目四卷經亂失去

寶日軒

錢塘王鈞字馭陶耄年歸里闢養素園以娛老樹石
池館之勝甲於里中子德溥字容大號澹和事親至
孝喜聚書築寶日軒爲藏弄之所祕冊古槧充牣其
中嘗輯北郭詩鈔未成而卒按丁龍泓先生馭陶先
生七十壽序云養素園者王秀才容大奉其尊人馭
陶先生養老之所也容大天質純懿性尤勤敏於學
綺妙之年卽已聲噪藝林爲儕偶所推乃益聚

四庫書構寶日軒藏之鍵戶披誦嚴督課其諸子暇則手自編纂舊聞勤勤不已又汪劔秋先生題小米松聲池館勘書圖詩有武林藏書家吳趙王與汪之句注云吳氏瓶花齋趙氏小山堂王氏養素園及君家振綺堂皆著名者

開萬樓

汪啟淑水曹清暇錄云江浙藏書家向推項子京白雪堂常熟之絳雲樓范西齋天一閣徐健菴傳是樓朱竹垞曝書亭毛子晉汲古閣曹倦圃古林鈕石溪世學堂馬寒中道古樓黃明立千頃齋祁東亭曠園

近時則趙谷林小山堂馬秋玉玲瓏山館吳尺鳧瓶花齋及予家開萬樓啟淑字秀峰號詎庵官工部都水司郎中本歛人居於杭之小粉場開萬樓藏書之外又有飛鴻堂嗜古若渴集古印萬紐著印存印譜印叢極漢晉金石之大觀乾隆三十七年

詔訪遺書啟淑進六百種內劉一清錢塘遺事許山高建康實錄蒙

宸翰題詩並

賞古今圖書集成一部爲好古之勸士林榮之少工吟詠當杭堇浦太史歸田之後與樊榭諸老結社南

屏初庵以終賈之年騁妍抽祕進與諸老宿抗行其
他雜著有焯掌錄小粉場雜識厲鶚樊榭山房集有
汪秀峰自松江載書歸招同人小集分韻詩云雪壓
扁舟浪有稜載來書重恐難勝排聯清興惟同鶴增
長多聞似得朋歸洛舊傳東野句入杭新並蓼塘稱
銜杯不獨相欣賞欲賃鄰居翦燭膽

抱經堂

盧文弨字召弓號磯漁又號檠齋晚號弓父抱經其
堂顏也人稱曰抱經先生乾隆壬申一甲第三人進
士歷官翰林院侍講學士壬子重游泮宮年七十九

卒生平精於校讐陸氏經典釋文嘗取宋本參校別
爲考證又彙萃諸書校勘記名曰羣書拾補其小引
云文弨於世間技藝一無所能童時喜鈔書少長漸
喜校書自壯至老積累漸多嘗舉數冊付劖劂氏年
家子梁曜北語余曰所校之書勢不能皆流通於世
其藏之久不免朽蠹則一生精神虛擲旣可惜而謬
本流傳後來無從取正雖自有餘奚裨焉意莫若先
舉缺文斷簡譌繆尤甚者摘錄以傳諸人則以傳一
書之力分而傳數書費省而功倍宜若可爲也余感
其言就余力所能友朋所助次第出之名曰羣書拾

補雖然卽一世之譎而欲悉爲標舉之又復累幅難罄約之又約余懷終未快也然余手校之書將來必有散於人間後有與余同好者能公諸世庶余之勤爲不虛錢大昕羣書拾補序云抱經先生精研經訓自通籍以至歸田鉛槧未嘗一日去手奉廩修脯之餘悉以購書遇有祕鈔精校之本輒宛轉借錄家藏圖籍數萬卷手自校勘精審無誤自宋次道劉原父諸公皆莫能及也又嚴元照書羣經札記後先生喜校書自經傳子史下逮說部詩文集凡經披覽無不丹黃卽無別本可勘同異必爲之釐正字畫然後快

嗜之至老愈篤自笑如猩猩之見酒也

欣託齋

道古堂文集欣託齋藏書記云汪子一之性無他嗜壹志於羣籍補其遺脫正其譌謬儲蓄旣多鑒別尤審余年才舞勺卽具此癖謂古集皆手定人不一集集不一名東坡七集欒城四集山谷內外集明人妄行改竄題曰東坡欒城山谷集而已朱子集多至三百餘卷明人編定止四十卷李綱梁谿集多至百三十餘卷建炎進退志及時政附焉閩中改刻題曰李忠定集亦止四十卷前後互易古人面目失矣宋刻

兩漢書版縮而行密字畫活脫注有遺落可以補入此真所謂宋字也汪文盛猶得其遺意元大德版幅廣而行疏鍾人傑陳明卿輩稍縮小之今人錯呼爲宋字拘版不靈而紙墨之神氣薄矣甚至說文而僞入五音韻譜通典而僞入宋人議論夷堅志而僞入唐人事迹與元書迥不相謀明人之妄如此今之挾書以求售者動稱宋刻不知卽宋亦有優有劣有大學本有漕司本有臨安陳解元書棚本有建安麻沙本而坊本則尤不可更僕以數青雲梯錦繡段皆成于臨場之學究而刻于射利之賈豎皆坊刻也不謂

之宋刻不可也五十年以前曾與吳繡谷趙勿藥兩君斷斷切究之自矜以爲獨得之祕一之卽能登吾堂而躋吾蔽可不謂之夙有神解乎欣託齋有山池之勝一之讀書其中卽藏書於其中積卷至二十萬有奇可謂富矣申案一之諱日桂字一枝號一之仁和貢生爲首禾先生之弟首禾諱日章由中書入直樞垣歷官江蘇巡撫聲施洋溢家居義井巷有春草堂頗具園林之勝老宿如丁龍泓吳西林周亦耕多與盤桓兄弟十人登科者五日贊日永日孜日葵俱見杭郡詩輯一之相與切磋覃研經史足以抗衡文

采風流照耀一時余家藏宋刊漢書仁和朱朗齋跋
云武林汪氏有振綺堂爲藏書之所與同郡諸藏書
家若小山堂趙氏飛鴻堂汪氏知不足齋鮑氏瓶花
齋吳氏壽松堂孫氏欣託山房汪氏皆相往來彼此
互易借鈔借校因得見宋槧元鈔不下數百十種然
其中關繫經史之大者無多惟欣託山房有魏鶴山
儀禮要義一部爲經學失傳之本

琴趣軒

黃鐘字朗亭號鐵庵仁和例貢歷官刑部郎中性好
聚書終日讎校如對古人儻好施予有告者無不

滿其意以去嘗按都中客死遺骸埋藏無遺著有春
華閣詩鈔鍾子濠字滌江號學癡有未節稿手鈔祕
籍多至百種其自述云秉志以剛負氣以直教子一
經交友三益非曰能詩但解塗抹遺之子孫幸存吾
拙可以概其生平濠子杓字星橋號玉繩性嗜書畫
而尤喜究其源委家故多先世所藏書因爲詳著其
姓氏尙論其流派爲畫載二卷杓弟模字相圃號書
厓嘉慶庚申歲貢少得詩法于丁龍泓沈椒園吳西
林三先生長遊于閩歸而館于南城孫氏者二十餘
年研精覃思一意著述有三家詩補攷夏小正分箋

武林藏書錄卷下
異義國語補韋竹書詳證蜀書箋略武林先雅皆極
精核模子士珣字薌泉號扣翁幼秉庭詔過庭之暇
多所薰習發爲詩文奧如曠如嘗館汪小米舍人家
校刊咸淳臨安志最爲精核有滄粟齋詩北隅掌錄
世守青箱虎林交口稱之

翟氏書巢

杭城並江而東數十里村落萬餘率柔糾絲結綫罕
習文辭獨場嘉橋翟氏一門以詩書鳴而晴江尤稱
彪怒晴江名灝字大川乾隆甲戌進士官金華府教
授其居室榜曰書巢山經地志稗史說部佛乘道誥

靡不儲度旣漁獵之又弗炙之所著四書考異爾雅
補郭湖山便覽艮山雜志通俗編無不宜齋詩集可
以徵其淵博矣自記曰齋之東有軒三楹周列度閣
儲書檢閱餘不暇收拾橫斜累疊有似乎鵲之巢因
自命曰書巢杭世駿記曰翟子榜其齋曰書巢規爲
圖環堵之室而卷且盈萬屬余爲記巢之名不在於
釋宮比於燕之壘鵲鳩之房鷓鴣之一枝義無所取
取其棲憑焉爾仰而矚巢也俯而窺書也空洞無一
物外戶而不閉義何所取取其貪人之所不爭竊盜
之所不顧焉耳巢則曷以名書示所重也沈遼雲巢

林憲雪巢徐陰海棠巢然且不免乎逐耳目之好書則居之安樂而玩浸淫焉而益人神智故重之重其書所以重其巢也書則曷以名巢無翼而飛不脛而走者書也勞之則聚逸之則散朝斯夕斯寢斯饋斯若終老之菟裘若栖心之精舍旣以巢書亦以巢翟子也故曰書巢也翟子無他嗜亦無他營慥慥乎排纘而編緝之莊莊乎正襟危坐而雒誦之忘憂忘食勉焉日有孳孳而不知老之將至或曰嘻甚矣乎翟子之愚也翟耕於東郭之野穫之捩捩積之栗栗發其窖藏可以穀婦子可以徵貴賤操奇贏以自饒翟

氏世家郭外桑柘繞屋蠶績盈筐抱布而貿響緯雙而紡弄機杼而織可以衣被一屋可以大庇寒士不是之務書積而室不寬書益而財日損雖至愚者不爲而謂翟子甘心而不悔乎或曰翟子處若忘行若遺貌誠類愚徐而察其術壹似夫小癡而大黠者何也翟子所與偕所與遊所與歲時伏臘黨醮而蜡飲者皆鄉之人也使翟子棧齷以架壑淵濼以規陂畜文魚蒔美竹飾犧尊列雁壺絃瑤琴纏寶瑟設百步之障懸九華之鐙于時鼓鼓于時考考皆鄉人之耳目所未嘗經也視聽眩轉心志迴易不召而赴者且

日三四至焉叫者噉者諱者踞者號噉而索飲者跳
跟下上擾雜乎斯巢之中翟子力不能禁且將加禮
焉而翟子憊矣書則世之人之所不欲觀者也鄉之
人以爲獲石田而無所用之也亦旣觀止若鐘鼓之
享爰居不驚駭而卻走者希矣翟子從容宴處無應
對之煩無絲毫之費坐享南面百城之樂揖聖賢於
千載之上禦流俗於千里之外翟子之書巢成而翟
子之計得矣余嘗造焉不知翟子所讀何書也示余
詩驚怖其言猶河漢而無極與之言與鄉之人所言
頗不類且與城之儒衣而蠶步者所言亦不類則書

之所益大也乃知翟子愚於貌而不愚於心愚於生
計而工於言也而或人不知或則以爲愚矣又或則
以爲狡矣是鄉人之愚且狡者之言也而翟子倜倜
乎遠矣

東嘯軒

郁佩宣名禮號潛亭錢塘諸生家有東嘯軒軒額爲
董香光書庭前雙桂猶明萬厯閒所植交柯接葉清
蔭滿簷藏書充物綠映牙籤潛亭又增益所未備頗
成鉅觀時小山堂趙氏藏書雖散殘帙尙多異本悉
力購之非比較理晨夕不休所居駱駝橋與厲徵君

樊榭山房近不一里傳錄其祕冊尤多徵君沒後其家出遼史拾遺手稿潛亭購之中缺五十葉百求不得一日至青雲街見拾字僧肩廢紙兩巨籠檢視之皆厲氏所棄徵君平日掌錄遼史拾遺在焉亟市以歸勞如亂絲一一爲之整理閉戶兩月綴輯成編適符所缺振綺堂汪氏後爲雕行洵潛亭之功也鮑廷博庶齋老學叢談跋右老學叢談楷書精整出自錢唐汪西亭氏吾友郁君潛亭所貽也君恂恂儒雅尤與予暱無三日不相過從過必挾書而來借書而去雖寒暑風雨不爲少閒

關氏書樓

關少宗伯槐字柱生號雲巖又號晉軒生時母夢旭日照鉅槐上寤而得男遂名曰槐九歲善隸書擘窠嘗書觀海二大字於歿光石上少得趙氏小山堂天文遺書筆算筆算奇門遁甲凡三百餘種因留心句股之學鄉選後赴津門應召試賜內閣中書入直樞垣以善畫爲

純廟垂賞旋舉庚子二甲一名進士入翰林直南書房歷充

四庫館武英殿提調退息之所有兩古松翠蔭几案

於是

賜詩有松下做書寮之句因恭篆松下書寮四字顏其楣視學粵東時奏童子能全讀五經者優予入學並覆試加經文一篇蒙著爲令後由閣學擢禮部右侍郎居第在駱駝橋廳事敬懸

御書以實爲之桂林一枝二額子炳以廕官雲南大理府知府以宗伯卒于宿遷舟次未嘗一日居新第因肖其象于後圃之書樓樓臨東河清波輝映神采儼然咸豐初其書次第散出宋槧元雕頗多異册並有內廷陳設退出之籍白紙朱絲莊書整釘非尋常

所有余亦得其零編殘簡數百種旋失于辛酉之劫至今猶憮然思之

思茗齋

宋大樽字左彝號茗香仁和人乾隆丁酉順天舉人官國子監助教有學古集牧牛村舍外集工校讎王宗炎爾雅新義序宋山陰陸氏爾雅新義爲世所罕觀吾邑陸君芝榮陳君培得仁和宋助教大樽手校本審定鏤版又馬定柅贈茗香助教詩云辛苦風塵兩載餘攤書盡日對窗虛棠梨晷影分明在遙憶先生國子廬又嚴元照書雲煙過眼錄後自武林歸經

塘棲里訪宋茗香觀所藏書中有丁龍泓先生手鈔
雲煙過眼錄一冊子咸熙字德恢號小茗嘉慶丁卯
舉人官桐鄉教諭有思茗齋集集中有借書詩序云
藏書家每得祕冊不輕示人傳之子孫未盡能守或
守而鼠傷蟲蝕往往殘缺無怪古本之日就湮沒也
先君子藏書甚富生時借鈔不吝熙遵先志願借於
人有博雅好古者竟持贈之作此以示同志詩云金
石之物亦易泐況茲柔翰歷多年能鈔副本亟流播
劫火來時庶不湮翳予老病子猶癡過眼雲煙看幾
時濁酒一瓶何用報先公泉下亦怡怡小茗先生承

遺訓紹家傳守流通古書之約其有功于載籍者大
矣嘗輯注夏小正劇精核耐冷譚詩話亦傳布藝林
秉鐸於桐鄉時輯有桐溪詩述搜採甚博

小倉山房所好軒

所好軒者袁子藏書處也袁子之好眾矣而何以書
名蓋與羣好敵而書勝也其勝羣好奈何曰袁子好
味好色好葺屋好遊好友好花竹泉石好珪璋彝尊
名人書畫又好書書之好無以異於羣好也而又何
以書獨名曰色宜少年食宜飢友宜同志遊宜晴明
宮室花石古玩宜初購過是欲少壯老病飢寒風雨

無勿宜也而其事又無盡故勝也雖然謝眾好而瞿焉此如辭狎友而就嚴師也好之僞者也畢眾好而從焉如賓客散而故人尙存也好之獨者也昔曾皙嗜羊棗非不嗜膾炙也然謂之嗜膾炙曾皙所不受也何也從人所同也余之他好從同而好書從獨則以所好歸書也固宜余幼愛書得之苦無力今老矣以俸易書凡清祕之本約十得六七患得之又患失之苟患失之則以所好名軒也更宜又散書記乾隆癸巳

天子下求書之詔余所藏書傳鈔稍稀者皆獻大府

或假賓朋散去十之六七人卹然若有所疑余曉之曰天下寧有不散之物乎要使散得其所耳要使于吾身親見之耳古之藏書人當其手鈔縑易侈侈隆富未嘗不十倍于余然而身後子孫有以論語爲薪者有以三十六萬卷沈水者牛宏所數五瓦言之慨然今區區鉛槧得登

聖人之蘭臺石渠爲書計業已幸矣而且大府因之見功賓朋因之致謝爲予計更幸矣不特此也凡物恃爲吾有往往度置焉而不甚研閱一旦灘然欲別則鄭重審諦之情生予每散一帙不忍決捨必窮日

夜之力取其宏綱巨旨與其新奇可喜者腹存而手集之是散于人轉以聚于己也且夫文滅質博溺心寡者衆之所宗也聖賢之學未有不以返約爲功者良田千畦食者幾何耶廣廈萬區居者幾何耶從來用物宏不如取精多刪其繁蕪然後追之以不得不精之勢此予散書之本志也散書後記書將散矣司書者請問其目余告之曰凡書有資著作者有備參考者備參考者數萬卷而未足資著作者數千卷而有餘何也著作者鎔書以就己書多則雜參考者勞己以徇書書少則漏著作者如大匠造屋常精思於

明堂奧區之結構而木屑竹頭非所計也考據者如計吏持籌必取證于質劑契約之紛華而圭撮毫釐所必爭也二者皆非易易也然而一主創一主因一憑虛而靈一核實而滯一恥言蹈襲一專事依傍一類勞心一類勞力二者相較著作勝矣且先有著作而後有書先有書而後有考據以故著作者始於六經盛於周秦而考據之學則自後漢末而始興者也鄭馬箋註業已回冗其徒從而附益之捫彈踳駁彌彌滋甚孔明厭之故讀書但觀大略淵明厭之故讀書不求甚解二人者一聖賢一高士也余性不耐雜

竊慕二人之所見而又苦 本朝考據之才之太多也蓋以書之備參考者盡散之袁枚字子才號簡齋錢塘人乾隆丙辰薦試博學鴻詞己未進士官江甯知縣去官後僑居小倉山下名曰隨園備享林泉清福幾忘其爲杭人矣按汪啟淑水曹清暇錄乾隆三十七年開 四庫館徵訪天下遺書浙江進呈四千五百八十八種爲各省之冠而兩江總督進呈一千三百六十五種以散書兩記約之其中袁氏藏書必有數百十種據其所散卽知其所聚隨園雖未見書日流傳亦可卜當日儲藏之富矣

何夢華

何元錫字敬祉又字夢華號蝶隱錢塘人精於簿錄之學家多舊書善本嗜古成癖手自鈔錄祕書可數百冊聞某山中有殘磚斷碣則披榛莽歷澗谷搜幽索險務獲乃已一日入山迷道日曛黑不得出飢火中燒幾不可制賴野老丐以餘食且導之行始得歸聞者絕倒素有狂疾時或觸發後遊於粵中稽留數年遂客死有秋神閣詩鈔王槐懷夢華詩云夢華有奇癖兀作書中蟬紫文窮石室祕簡授瑤函披覽手箸錄沐髮不及簪忽聞有清闕一舸浮江潭直以性

命博豈止耳目貪歸來笑開口竟忘罄瓶甌讀君借
書圖技癢心懷慙他日一甌致不爾梁閒探又張鑑
夢華訪書圖歌夫君好古耽冥搜南探禹穴東之罍
手拓金石不知數口吟詞翰無與儔絳雲樓中焚未
失化鹿寺邊竊還出一千金購吳都文八萬卷充長
水宅日思誤字相貫穿手定黃墨窮鑽研涼州太守
車幾兩織簾居士手一編笑吾銜薑亦好事縱不能
訪頗爲累夜讌偷鈔述古堂朝游市閱慈恩寺憶昔
渡江至揚州吾師招住文選樓連牀照軫那可說手
胝口沐無時休此時何君日來往臨淄嚴安亦同賞

廣集甯論翡翠裘埃尋不類珊瑚網

姚古香姚虎臣

爾宋樓藏書志古逸民先生集鮑以文手跋曰是集
藏書家未有蓄之者吾友錢塘姚君古香得之親串
亂帙中好事者因爭傳錄未幾古香暴卒使先一年
此書無從蹤迹矣古香名瑚藏書多祕冊與予交最
善卒時年止三十餘嘉慶甲戌六月通介叟時年八
十有七又士禮居藏書題跋記梅花百詠傳本絕少
此本出杭人姚虎臣家陳仲魚爲余購者今虎臣已
故仲魚亦旋舊里好古之友無一二人誰爲之助余

發憤邪古香虎臣二先生之事蹟俱不可考豈卽好古堂之後人歟

童佛庵

童銓字佛庵仁和諸生家北郭貧無餘貲雅性愛古市集門灘時時搜訪所得頗有佳本惜身後斥賣殆盡聞其所藏前輩小像多至數十人不知今歸何處年七十餘賦詩而逝有亡魂願化莊周蝶只戀書香不戀花句惜佚其全什矣按郭頻伽浮眉樓詞童佛庵有素冊爲蠹魚所蝕其鑿空處皆肖蝶形殆天巧也詞以寫之近來不食人間字滿腔都是春恨青簡

生涯白蟬身世幻作漆園夢影羽陵困損算不似花間棲香差穩莫羨神仙蛻餘且就此中隱有人曝來永晝比夾雪新籤白描副本栩栩蘧蘧魚魚雅雅兩翅尙黏殘粉滕王休晒是癡絕書生香奩吟吻展向春風半窗芸葉冷調寄齊天樂

琳琅祕室

胡震之文學名樹聲又字雨棠以業澁由休甯遷杭入籍仁和雅好藏書所購多宋元舊本不吝值或更手自繕錄積至千百卷顏其居曰琳琅祕室見呂晉昭所撰傅子珽字心耘爲太常博士善承先志手自

武林藏書金卷下
三
鈔校插架益富著有嬾真子錄集證與吳郡葉調生
善調生遠祖石林先生爲北宋鉅儒著述甚夥調生
刊石林燕語建康集心耘更著石林燕語集辨不憚
三千里走京師詣清祕堂親檢永樂大典鈔得汪應
長辨目二百二條復從羣籍內搜錄宇文紹奕事實
若干條考證闕佚其篤嗜典籍如此葉調生吹網錄
中嘗記其校語十二條又有懷心耘詩良友他鄉慰
索居誓收祕籍劫灰餘如何遽返瑯環地拋擲遺編
絕蠹魚注云仁和胡心耘庚申冬避亂滬城欲廣收
已散之書辛酉夏齋志而歿遺書且莫保矣

玉雨堂

仁和韓文綺字蔚林號三橋幼以孝友稱乾隆丙午
解元癸丑捷南宮由刑曹出守永平擢清河道生平
宦蹟多著祥刑於粵於黔於蜀皆司秋憲繼擢少寇
蹶而復起又爲山左按察使儀徵阮文達撰墓銘稱
其治獄矜慎得情法之平撫蘇時會大水拯救菑民
請款至百萬厯官右副都御史以疾請退悠然林下
好聚書築玉雨堂以儲之孫泰華字小亭由兵部郎
厯官陝西糧儲道公餘搜訪金石忘其爲風塵中吏
也又訪求元朝各家之文收羅十餘年得百數十家

半係傳鈔精本或

四庫所無而元刊尙在者爲元文選以十家爲一集
道光庚戌首集旣成稿卽毀於燹僅存目錄著有金
石錄無事爲福齋筆談

丹鉛精舍

塘棲勞經元字笙士學於武進臧鏞堂之門性嗜收
書恣意流覽熟諳唐代典制著有唐折衝府考子三
長檢字青玉次權字巽卿次格字季言髫年均以治
經補弟子員後遂不與試巽卿精於校讐之學所校
有元和姓纂大唐郊祀錄北堂書鈔蔡中郎集文苑

英華及唐宋各家文集皆丹黃齊下密行細書均有
補遺附錄引證博而且精世稱善本兼工詞曲唐宋
元明閒卷藏皆舊本季言平居讀書時每置空冊於
案遇有疑義輒筆之暇時繙閱諸書互相考證必至
精密而後已藏書之所曰丹鉛精舍校書之印曰寶
事求是多聞闕疑著有讀書雜識十二卷唐郎官石
柱題名考二十四卷唐御史臺精舍題名考三卷其
友丁葆書爲之編次葉廷瑄浦西寓舍雜詠詩云真
讀書人賊亦欽纖塵不使講帷侵黃巾知避康成里
漢季儒風又見今注云仁和勞季言家塘棲累代富

藏書季言尤以博洽名賊酋至其門戒其徒謂此讀書人家毋驚之入室取架上卷帙觀之曰聞此家多藏祕籍何此皆非善本殆移匿他處邪徘徊良久不動一物而去賊亦知書異哉迄今不四十年遺籍流落塵寰書目亦散佚不傳書之不毀於寇此中豈有數邪

羅鏡泉廣文

廣文新城遷錢塘諱以智字鏡泉祖棠父景熹及廣文以乾隆乙酉嘉慶辛酉道光乙酉三膺拔萃爲世稱羨家富藏書至廣文尤孜孜羅集聞有異本必借

錄之丹黃握管日夕忘疲首題尾跋備溯源委於鄉邦掌故爬梳益力司訓西安著趙清獻年譜移鐸慈谿著

文廟從祀賢儒考居夾牆巷則仿東城雜記而爲新門散記別有經史質疑金石取見錄宋詩記事補詩苑雅談又集唐宋以後重排周興嗣千字文之制誥頌讚銘訓敘跋等文凡百篇可稱文苑之大觀吉祥寶藏書目不下數千百種庚申之劫避居海昌而歿書被劫半售甬東猶有存者而書目已不可問矣

蔣村草堂

蔣炯字葆存號蔣村仁和廩貢初官慈谿訓導歷保
縣令分楚北任廣濟卓著政聲所居西溪西南十餘
里山環水轉宅幽勢阻長松古檜梅花竹箭彌望無
際中有陂田數千頃澄湖曲汜復與煙嵐相閒蔣氏
聚族而居饒稷稻魚鰕菱橘之利屋數十椽聚書萬
卷葆存摘蔬淪茗之外覃研鉛槧物外翛然詩學中
晚唐散體文學三蘇長於議論浙東西名士多聞名
而訪之者高情朗志卽不主風雅之盟亦當爲山澤
之臞也見王昶蒲褐山房詩話

清吟閣

瞿世瑛字良玉號穎山錢塘人家雖素封迹若寒素
手鈔罕見古書以爲日課積數十年幾得千冊金石
書畫靡不考索張叔未解元徐問蘧汪駟卿明經常
主其家校刻東萊博議帝王經世圖譜陽春白雪世
稱善本築清吟閣以儲書籍曾編目錄計名人鈔本
七百九十二種批校鈔本四百七十五種影宋元鈔
本三十種皆祕笈異本而此外之古今版印之籍不
啻汗牛充棟矣惜失於庚辛之亂

清來堂

吳方伯煦字曉帆讀申韓家言才猷敏練倚馬可待

咸豐閒備兵上海兼縮藩條時江浙淪陷賊勢滔天
聯絡客將力保滬城厚集餉資乞援曾營備輪迎安
慶之勁旅卒以削平巨寇東南轉機實賴其力比歸
田里口不言功哲嗣冠雲部郎工書能文雅守儒素
世稱彷彿宋之張功甫旣號佳公子又爲窮詩人也
家有清來堂廣儲書籍埽劫灰之薪火萃四部之菁
華如朱文公手注論語中之顏淵一卷尤爲鎮屋之
寶有清來堂書目四卷不下五千種冠雲嘗著可久
長室詩存書將與之不散云

朱氏結一廬

仁和朱學勤字修伯咸豐癸丑進士由庶常改戶部
主事入直軍機章京歷官宗人府丞生平學敏才瞻
好書尤篤當

駕幸木蘭之後怡邸散書之時供職偶暇日至廠肆
搜獲古籍日增月盛編有結一廬書目其中宋槧者
如咸淳閒吳革大字本周易本義呂氏讀詩記紹熙
閒余仁仲禮記慶元閒沈中賓周禮註疏巾箱本附
音重言重意互註周禮蔡夢弼本史記晉書皇朝編
年備要西漢會要東漢會要兩漢詔令古史通鑑紀
事本末通鑑總類五朝名臣言行錄眞文忠公讀書

記皇朝仕學規範巾箱本劉子類編朱氏集驗方咸
瀆鎮江刻說苑黃帝素問靈樞集註六甲天元氣運
鈐麻沙刻鍼灸資生經藝文類聚翻譯名義集陸士
龍文集杜荀鶴文集古靈先生文集趙清獻公文集
淮海集朱子大全文集皇朝文鑑才調集花間集元
槧中如周易啟蒙翼傳周易參義禮書讀四書叢說
詩童子問春秋屬辭師說六書正譌兩漢詔令陸宣
公奏議金陀粹編續編十七史纂古今通要後集戰
國策校註古今紀畧風俗通義讀書分年日程纂圖
互註老子列子荀子揚子文中子呂氏春秋農桑輯

要理學類編孫真人千金備急方永類鈐方汲冢周
書仁齋直指方論百川學海困學紀聞錦繡萬花谷
輟耕錄黃氏日鈔金石例難經本義釋氏稽古畧道
院集要二程文集圖繪寶鑑簡齋先生詩集松雪齋
集靜修先生文集方是閒居小稿香溪先生文集漢
泉漫稿國朝文類唐詩鼓吹文粹風雅翼樂府詩集
詩人玉屑文心雕龍中州集餘明刊精鈔又數百種
不及盡紀

武林藏書錄卷下終

武林藏書錄卷末

錢塘丁申撰

周昭禮

兩浙名賢錄周煇字昭禮淮海人紹熙閒居錢塘清波門之南嗜學工文隱居不仕當世名公卿多折節下之而簡亢自高未嘗報謝藏書萬卷父子自相師友撰清波雜志十二卷又清波雜志借書一編還書一編後誤爲癡殊失忠厚氣象煇手鈔書前後遺失亦多未免往來於懷因讀唐子西庚失茶具說釋然不復芥蒂其說曰吾家失茶具戒婦勿求婦曰何也

武林藏書錄卷末
一
吾曰彼竊者必其所好也得其所好則寶之懼其泄而祕之懼其壞而安置之是物得所託矣復何求哉

周草窗

齊東野語世間萬物未有聚而不散者而書爲甚吾鄉石林葉氏藏書多至十萬卷其後齊齋倪氏月河莫氏竹齋沈氏程氏賀氏各不下數萬餘卷亦皆散失無遺近如秀崑東窗鳳山三李高氏牟氏皆蜀人號爲史家所藏僻書尤多今亦無餘矣吾家三世積累先君子尤酷嗜至鬻負郭之田以供筆札之用冥搜極討不憚勞費凡有書四萬二千餘卷及三代以

來金石之刻一千五百餘種皮置書種志雅二堂日事校讐居然籛金之富按齊東野語宋周密撰密字公謹號草窗寶祐閒爲義烏令入元不仕自號泗水潛夫晚年寓居錢塘癸辛街箸有癸辛雜志浩然齋雅談志雅堂雜鈔雲煙過眼錄並行於世見杭州府志及蓉塘詩話

阿魯鞏公

徐一夔撰李草閣先生墓誌銘云君諱昱字宗表其先汴人有諱初者從宋南遷遂居錢塘少從鄉里師口占詩已能出驚人語稍長刻意明經爲經義辭章

出同輩上就鄉試有司以其程文爲說過高棄不取
君曰科舉豈足以盡儒者之事耶乃營草閣於北門
之外取未讀之書盡讀之蓋有毅然直追古人之意
阿魯翬公元室文獻之老自翰林侍講學士退居郡
城之東聞君才名延教其子其家多藏書可資記覽
君爲三年留用是譽日益彰才日益高學日益博矣

快雪堂

馮文昌字硯祥嘉興諸生有吳越野民集硯祥爲司
成開之孫以次子裒仲贅於棲里沈氏遂徙家依之
晚年復居河渚以守司成之墓得右軍快雪時晴真

蹟因築快雪堂於西湖之孤山收藏甚富有宋刊金
石錄十卷極寶愛之手跋其後又爲刻印文曰金石
錄十卷人家長箋短札帖尾書頭每每用之申案是
書後歸趙晉齋魏復相繼爲阮文達韓小亭所得今
藏滂喜齋潘氏有馮文昌印字研祥馮氏三餘堂收
藏馮子玄家藏印平安館印五朱記其餘各家題詞
圖記充然滿幅洵驚人祕笈也又按天祿琳琅續
編分類補註李太白詩元萬玉堂刊馮氏藏本有馮
氏圖書馮印文昌文字之祥君家其昌馮氏三餘堂
收藏快雪堂圖書諸印

知不足齋

鮑廷博字以文號淥飲晚號通介叟歛諸生父思詡娶於仁和顧氏因家杭州嘉慶十八年 恩賜舉

人乾隆癸巳

詔開四庫館采訪遺書淥飲命子

仁和監生士恭進其家所藏書六百餘種蒙

賜

古今圖書集成一部又刊所藏古書善本成知不足齋叢書三十集士恭旋蒙 恩賞給舉人 仁

廟御製內府知不足齋詩云齋名沿鮑氏闕史

御題詩集書若不足千文以序推注云齋額沿杭城

鮑氏藏書室名乾隆辛卯壬辰

詔采天下遺書

鮑士恭所獻最爲精夥內唐闕史一書曾經 奎

藻題詠嗣後其家刊刻知不足齋叢書以唐闕史冠冊用周興嗣千字文以次排編每集八冊今已十八九集可爲好事之家矣嘉慶癸酉浙撫復以續刊進淥飲復蒙 恩賞給舉人卒年八十六淥飲勤學

耽吟不求仕進天趣清遠嘗作夕陽詩甚工人呼之爲鮑夕陽尤工詠物如闌干云有約頻敲花底月多情時拂柳邊風又云施朱太赤花應妬倚玉無人月也憐剪刀云細將楊柳偷裁出不信春風也學伊皆有風致申按朱文藻知不足齋叢書序云吾友鮑君

以文築室儲書取戴記學然後知不足之義以顏其齋君讀先人遺經益增廣之令子士恭復沈酣不倦君字之曰志祖蓋嗜書累葉如君家者可謂難矣三十年來近自嘉禾吳興遠而大江南北客有舊藏鈔刻異本來售武林者必先過君之門或遠不可致則郵書求之浙東西諸藏書家若趙氏小山堂汪氏振綺堂吳氏瓶花齋汪氏飛鴻堂孫氏壽松堂鄭氏二老閣金氏桐花館參合有無互爲借鈔至先哲後人家藏手澤亦多假錄得則狂喜如獲重資不得雖積思累歲月不休余館於振綺堂十餘年君借鈔諸書

皆余檢集君所刻書余嘗預點勘余與君同嗜好其甘苦君以爲知之深者莫余若也

鑒止水齋

許宗彥字積卿又字周生本德清人後其子入籍錢塘生有異質九歲能誦經史喜屬文十歲卽不從師經史文章皆自習之乾隆丙午舉於鄉嘉慶己未成進士授兵部車駕司主事嘗訓諸子曰讀書人第一須此心光明正大澄清如止水無絲毫苟且不可對人處故名所居曰鑒止水齋有文集十二卷詩集八卷性寡嗜好惟喜購異書不惜重價藏弄滿樓於書

無所不讀實事求是旁及道經釋典名物象數必殫其奧而後已阮氏元蔡氏之定陳氏壽祺爲撰家傳墓銘按豐順丁氏日昌持靜齋書日中有鑑止水齋書日一冊鈔本長洲顧沅於道光己酉三月客杭從羅鏡泉假錄見卷首手跋又云余與其吉嗣子雙明府有舊聞其書於兵燹後散亡殆盡不勝悵然申又按許氏書先得於粵東又轉得於瓶花齋零帙實多祕笈自子淥丈官蘇子雙丈官粵其書質於許氏辛泉家咸豐辛酉辛泉家爲僞府克復後爲左制軍行臺燒殘撕毀益不可問矣

釋道經版

杭州寺觀相望田叔禾謂唐以前有三百六十寺錢氏立國宋室南渡增至四百八十寺道院祠廟猶不與此數可謂多矣然釋有經典道有符籙版刻流傳較儒學尤爲罕覯如松江府青浦之珠街閣圓津禪院玉蘭亭侍郎所捨之妙法蓮華經註卷七末頁木記云本鋪今將古本蓮經一一點句請名師校正重刊選揀道地山場鈔造細白上等紙札志誠印造見住杭州大街棚前南鈔庫相對沈二郎經坊新雕印行望四遠主顧尋認本鋪牌額請贖謹白又韻宋樓

藏書志關尹子言外經旨三卷宋王夷受撰元刊本
後有至元癸巳重陽日平陽府洪洞縣萬安里龍祥
萬壽宮住持提點保真文靖大師冲和子姬致柔於
浙西道杭州路梅橋南玉屏福惠觀重新校正命工
印行一條合記二氏之遺經亦不勝思古之感焉

上乘院

上乘院在西溪之東梅花塢中貞觀十九年建舊名
龍居治平閒重建改今額有寂觀堂崇禎初郡城新
伊法師退隱此庵有書冊藏經禪講學人欲閱藏請
益者依之故有十餘靜室附焉釋大善上乘院詩萬

斛松筠覆草廬千函文字寄溪居龍王藏惜宮中寶
野衲披宣架上書瓦鼎生煙拈紫椀磁瓶貯水插紅
蕖如今禪講交參日共集花巖作蠹魚見乾隆杭州
府志又城東法藏院僧桂埜號納庵蜀人嘗集書本
藏經全者凡二部餘則鈔補咸豐辛酉因寇警移藏
西溪護生庵中仍爲土賊所掠桂埜亦不知所終特
附記焉

靈隱經藏

嘉慶戊辰己巳閒吳中石孫堂韞玉掌教紫陽書院
嘗偕寺僧若水晶蓮二上人編輯靈隱經藏撰碑以

紀其事云將執文字以求佛可乎曰文殊問維摩之疾會意而忘言達磨安神光之心迎機而懸解學佛不可執文字也將離文字以求佛可乎曰法盧造字釋迦亦傳習多師傅達多聞慶喜爲總持第一學佛又不可離文字也是故龍威授簡九流著於藝文鳩摩譯經千佛標其名義雖華裔分域儒墨異流而問迷塗者必仗神鍼游覺海者先尋寶筏彼大士假圓通說法非教莫宣中華由聲音入觀捨經奚惜昔之尊宿六如觀幻四諦徵空入精進之林則手書貝葉轉華嚴之藏則舌吐蓮花非偶然也靈隱寺者西湖

之上刹也兩峰映帶四眾皈依佛開法會飛來鷲嶺
一峰

帝錫嘉名

敕賜雲林二字然鐙座下習四種之威儀卓錫山中受十方之供養游觀者無金狄之譏受持者有木義之戒真東南一大道場也惟是舊藏經文不戒於火珠林祕笈遽化秦灰石室曇章無存魯壁九譯莫詳其文三寶竟闕其一將何以闡揚聖教接引學人余寄公樂土訪道名山適若水晶蓮兩禪師先後主持方丈每談斯事輒爲太息余因發願重加結集時則

有吳中會一師在嘉興楞嚴寺脩治經版遂與商榷
凡集大藏經論等一千六百五十五種裝成一千四
百三十八冊又附貯藏外論疏語錄各書一百五十
種裝爲四百五十六冊綜爲二櫃藏諸寺之蓮鐙閣
上伏願典守有司紹隆無替瑯函萬卷常宣木鐸之
音寶歷千秋永絕風輪之劫爰撰斯記以示後人是
役也共用白金三百四十兩此邦紳笏贊我勝緣者
別勒芳名同昭善果惜乎劫遇庚辛盡遭燹火訪蓮
燈遺址不禁感慨係之

吳山火德廟道藏

道藏分三洞第一洞真部第二洞元部第三洞神部
四輔第一太元部第二太平部第三太清部第四正
一部十二類第一本支類第二神符類第三玉訣類
第四靈圖類第五譜錄類第六戒律類第七威儀類
第八方法類第九眾術類第十紀傳類第十一讚頌
類第十二表奏類自天地元黃至範漆壁經府羅排
字編號明治城白雲霽詳注目錄蕭山王端履於乾
隆辛亥八月侍其師王南陔先生并其父晚聞先生
鈔錄道藏於火德廟重論文齋筆錄有寓火德廟兩
次翻閱道藏詩冊府圖書祕護嚴重樓管鑰紫泥緘

石郎與我曾相識偷示南華第一函石室收藏並石
渠乞將祕笈付鈔胥元珠密語金丹注俱是人間未
見書玉宇西風拂面寒西爽閣爲廟
中最勝處胡麻飯熟勸加
餐洞真部錄三千卷不是神仙不許看胡孟紳比部
理聽香齋集有觀吳山火德廟道藏並成化年賜天
尊像十六幅詩於道教宗源纂發盡致不啻繙覽瓊
章玉笈云詩曰巫峰十二高插天赤燁祠宇森娜嬛
余科玉篆久藏弄握衣肅謁趨丹闕道流解事頗不
俗啟鑰導客快縱觀巨櫛分列儼四庫緋帙完好無
叢殘諦視卷首誌年月鴻寶知自前明頒江東三藏

此其一天龍呵護留人寰金閭白門距千里鼎峙恰
並吳山巔元妙觀對虎邱墟朝天宮近雞鳴山是皆
塵世大瀛海羽陵何必求神仙潛研宮詹最嗜古老
窮目力搜遺編手鈔行篋六百卷跋尾一一能貫穿
謂宋藏日久亡佚得元明本良已難周秦載籍資考
訂貴之不翅青琅玕說見潛研堂文
集道藏目錄跋緬思天水昔馭

字祥符宣政相後先瘦相旣領玉清使靈素復玷青
瑣班天書曳帛侈祥瑞道君受籙徒欺謾岳圖真誥
闕禁籙醮詞章奏崇雷壇維時道藏始傳布剗劂遠
在書棚前熒惑廟址尙未建洞霄提舉多兼員運開

臨安大都會名山藏合傳千年自洞真部迄正一峩
峩七畧紛排籤說宗彼教苦難信古書時或參其閒
杜鎬老儒工潤色京卞亦頗文章嫺刺取子史雜家
類廁諸黃老詞旁牽篇章約畧舉其要陳晁舊目存
相沿孔師柱下闡奧旨漢學河上遺真詮飛鉗鬼谷
託呂望沖虛擲列齊辛鉞更生抱朴代有述周俊尹
喜枝而駢參同契衍伯陽訣鴻烈解證淮南篇就中
郭象本宋產南華秋水尤精研醫經况復富充棟歧
雷炮灸傳倉扁寥寥足本在天壤得斯笈幸蒐羅全
明初去宋尙未遠文教遠被東南偏初鈹昉自正統

代下逮萬厯重雕鐫年深譌闕那得免粹語要未菁
華刪如披大典溯永樂如窺書目儲文淵迄今又閱
三百載世無宋槧惟明棗古香什襲永辟蠹摩掌舊
澤猶瀰爛丹青侑以名繪手展視筆力皆飛騫或步
罡斗禮北極或參蚪馭朝水官金門潭潭竦圭璧火
車爚爚撐戈鋌星冠絢爛泚金碧霞裙綵縹烘朱殷
藏珍數有二八幅仿阿羅漢摹唐賢裝池精美鮮剝
蝕背鈴御璽朱文鮮成化一十有六載尙方敕賜昭
其虔我聞茂陵好元學慕漢武常求還丹李牧省爵
寵方士僧繼曉術尊胡祇容成訣貢萬妃媚樂大欺

售汪直姦禱祠土木盛交作勢憑廠衛由中涓流傳
繪像意何益闔門書史空傳宣縱云謝戴具師法風
自鄮下何觀焉不如琳瑯一萬冊采掇中有儒家言
科儀符籙雖羸雜悟道豈必忘蹠筌書生饞眼說已
飽得游福地真天緣人生百事奈牽帥安得俗慮胥
屏捐精廬就近數椽築壚香茗椀供丹鉛繙經坐久
不忍別夕陽西墜猶流連看江一笑出門去秋潮變
沒隨雲煙廟在梓潼祠南宋以火德王故南渡後建
廟於此以奉熒惑之神明董文敏書坎離旣濟額旁
有巫山十二峰雍正六年總督李公衛建亭題曰巫

峽峰青咸豐辛酉廟燬書亦散佚

武林藏書錄卷末終

